



Gäll, de kennsch mi nit?

S Ghaimnis, daasch versteggt,
wär under dääre Larve steggt.
He, gäll de kennsch mi nit?
Daas wird nyt verroote hit!

S git no vyyli dausig Ghaimnis mee,
im Museum fir Kulture kasch es gsee.
E Uusstellig isch deerte zem Bsueche,
zue däm Thema kasch verdiefft go sueche.

Ob Freimuurer oder anderi ghaimi Bünd,
unergläärliigi Myschterie hän mänggi Gründ,
s git jo so vyyli Rätsel und Rezäptuure,
vyyles blyyben aber ghaimi Brozeduure.

Hiete dien drei Abbezäller Buure,
s Rezäpt vom guete Kääs, die Stuure!
S Zaubergheimnis isch au son e Sach,
im Tschoope und in Kischte het s mänggs Ghaimfach.

Doggtterghaimnis kennt me scho syt Joore,
s Banggghaimnis goot au grad no verloore!
D Ghaimnis sin versteggt und verboorge,
mit Ghaimnschrifte het d Armee grossi Soorge.

Ghaimnis git s au im Gotteshuus,
me glaibt und bläärt mit, durchhuus.
S Byychtghaimnis, so heert me munggle,
nimmt dr Pfaff drnoo mit ins Dungle.

Glaubensghaimnis in vyyle Religioone,
Gmainschafte hän au iiri Informazioone.
E Ghaimnis dailt me amme au under Frind,
me duet lyysele und giigele wien e glai Kind.

Aggduells blyybt hittigsdaags nit ghaim,
Whistleblower sin iberall deheim,
Anonymous geen im WEB uff Odysee,
und dr Daateschutz? Dää isch passée.

S Spiilzygwältemuseum zaigt ganz digg,
dr Karneval vo Venedig isch so schygg,
scheeni Stoff us Handwäärggskunscht,
venezianischi Fantasy im Morgedunscht.

In dr Lagune uff de Masgebäll,
bresäntiert me sich as kulturell.
Schaarm und Myschtik sin drum Pflicht,
noobli Goschdyym mit stolzem Gwicht.

Dr Karneval isch e gross Eraignis,
under Masgge alles ai Ghaimnis.
Feschte ohni Tabu und Limit.
He, gäll de kennsch mi nit?

Basel het aaber Venedig ebbis voruss,
d Fasnacht het nämlig e Label duss.
D Unesco het s is nit verweert,
und fir e lääbigi Kultur geert!

Bis zem Rädäbäng sott me maine,
sin au d Sujet ganz im Ghaim.
Bestuune ka me am Cortège denne,
e faarbig Schaar iber d Route renne!

Sit 10 Joore faare mer mit Schääse,
Goofe dien allewyl Dääfeli ufflääse,
under groosse Larve dien mer intrigiere,
und in scheene Goschdyym kokettiere.

Doch egal, was fir Sujet mer karriere,
divärsi Larve und Goschdyym bresäntiere,
bättlet wird und griefft nach em Waggis,
was fir Hoornoggse, das sin alles Gwaggelis.

Mer gutiere s und sin drbyy,
drei Daag, scho isch s verbyy.
He, gäll de kennsch mi nit?
S Ghaimnis wird nit verroote hit!